



Inatsisartunut isummerfigisassatut siunnersuut, Naalackersuisut peqquneqassasut malittarisassanik pilersitseqqullugit, inuussutissarsiutinut ilinniarfinni ingerlariaqqiffinnilu ilinniartunut periarfissaalissasoq misilitseqqinnissaq karakterit qaffassarnissaat siunertaralugu.
(Inatsisartunut ilaasortaqaq Nivi Olsen, Demokraatit)
(Siullermeerneqarnera)

Qujanaq Demokraatit Inatsisartunut ilaasortaataannut Nivi Olsen-imut isummerfigisassatut siunnersuummut pissanganartumut, ilinniartunut atuartunullu inuussutissarsiutinut ilinniarfinni ilinniarfinnilu ingerlariaqqiffiusuni angusaqarluarnissamik siunertaqartumut.

Malittarisassanik nutaanik eqqussineq, inuussutissarsiutinut ilinniarfinni aammalu ilinniarfinni ingerlariaqqiffiusuni ilinniartut misilitseqqinnissamik karakterit pitsanngorsarnissaat siunertaralugu, arlalitsigut pitsaaqutitaqarsinnaavoq.

Siullermik pingaarnertullu ilinniartunut ilinniagartuunngorniarnissamullu kajumissusaannut qaffassaataasinnaavoq. Ilisimallugu, misilitseqqinnikkut karakterit/angusat pitsanngorsarnissaat periarfissaqartoq, ilinniartuq ilinniakkamini piffissaqarnerullunilu eqeersimaarnerusinnaavoq taamatullu ilinniakkami imarisaanik itinerusumik paasisaqarnerulersinnaalluni. Taamaaliornerup kingunerisinnaavaa qinnuteqartut piareersarsimalluarlutillu piginnaasaqarluartut, siunissami suliffeqarfinnut iluaqutaasussat, unammilligassanut piareersimalluarnerusut.

Aammataaq misilitseqqinnermut periarfissap misilitsinnermi uippakajaarnerit annilaanganerillu pisartut annikillisarsinnaavaataaq. Ilinniartut amerlasuut misilitsinnerit nalaanni oqimaatsorsiorartup, ilaasalu misigisimasarlugu, piginnaasatik naammattumik takutissinnaasimanagit uippakajaarneq allallu pissutsit tunngavigalugit. Ilisimallugu, angusartik kingusinnerusukut pitsanngorsarsinnaanissaanut periarfissaqarluatik, ilinniartut toqqissisimanerusinnaapput sunnertisimavallaaratillu misilitsinnerminni.

Suliffeqarfinni sulisut misilitseqqinnikkut karakteriminnik pitsanngorsaanissaminnut periarfissaqartut aamma ilinniaqaqarnissaminnut ineriartortuarnissaminnullu piumassuseqarnerussapput. Tamanna ileqqumik pilersitsisinnaavoq inuuneq tamaat ilinniarnermik pitsanngorsaajuarnermillu sunniuteqartunik, suliffeqarfinnik allanngorartuurtuni pingaarluinnartoq, piumasaqaatit teknologiilu ineriartortuarmata.

Naggataatigullu malittarisassat taakku nutaat eqqunnerisigut ilinniaqqinnernut aamma iluaqutaasinnaallutik. Ilinniartut karakteriminnik pitsanngorsaanissaannik kajumissaarnerisigut ilinniaqqinnissat tigussaanerulerlutillu pilerinarnerulissapput, ilinniartitaanikkut piginnaasaminnik qaffasaanissamik kissaateqartunut imaluunniit atorfimminnik allanngortitserusuttunut.

Tamaat isigalugu misilitseqqittarnermut malittarisassat eqqunnerisigut ilinniartunut, suliffeqarfinnut aammalu ilinniaqqinnissamut pitsaasumik pissarsiffiusaaq ilinniarsimanerup qaffasissuunissaanik ileqqup



ineriartortinnissaanut, uippakajaarnerup annikillisarnissaanut inunnerullu tamarmi ilinniarfiunerata siuarsarnissaanut.

Taamatut oqaaseqarluta siunnersuut ataatsimiititaliamut susassaqtumut ingerlateqqipparput ilaatigut paasiniarlugu, malittarisassap nutaap pitsaaqutit ajoqutaasinnaasullu allat kingunerissanerai ilinniarfeqarfinnut, pisortat ingerlataannut aammalu suliffeqarfinnut namminersortunut.